

საქართველოს ტექნიკური უნივერსიტეტის

დებულება მაგისტრატურის შესახებ

აკადემიური საბჭოს 2012 წლის 26 ივნისის დადგენილება №704

(შეტანილია ცვლილებები აკადემიური საბჭოს: 2014 წლის 25 ივლისის №1240, 2014 წლის 8 დეკემბრის №1358, 2017 წლის 8 თებერვლის №2313, 2017 წლის 10 ნოემბრის №2645, 2018 წლის 25 ივლისის №01-05-04/191 დადგენილებებით)

1. დანიშნულება, მიზნები

1.1. მაგისტრატურა აკადემიური უმაღლესი განათლების მეორე საფეხურის საგანმანათლებლო პროგრამაა, რომელიც მოიცავს სამეცნიერო კვლევის ელემენტებს და მიზნად ისახავს ბაკალავრის შემდგომი დონის სპეციალისტის ან მკვლევარის მომზადებას, აგრეთვე პირს ამზადებს მიღებული კვალიფიკაციით მუშაობისათვის;

1.2. მაგისტრატურაში სწავლის მიზნებია:

- სამეცნიერო-კვლევითი მუშაობისა და უმაღლეს საგანმანათლებლო დაწესებულებაში პედაგოგიური მოღვაწეობისათვის მომზადება;
- სპეციალობის შეცვლა;
- კვალიფიკაციის ამაღლება.

2. სამაგისტრო პროგრამების (სპეციალობების) ჩამონათვალი

2.1. სტუ-ს ძირითადი საგანმანათლებლო ერთეული – ფაკულტეტი, სკოლა (შემდგომში ფაკულტეტი) “უმაღლესი განათლების შესახებ” საქართველოს კანონის შესაბამისად, შეიმუშავებს სასწავლო, სამეცნიერო-კვლევითი და შემოქმედებითი საქმიანობის ძირითად მიმართულებებს, ადგენს შესაბამის პროგრამებსა და გეგმებს;

2.2. ფაკულტეტის აკადემიური დეპარტამენტის, ხარისხის უზრუნველყოფის სამსახურისა და საბჭოს მიერ განხილული სამაგისტრო საგანმანათლებლო პროგრამები შესათანხმებლად გადაეცემა სტუ-ს ხარისხის უზრუნველყოფის სამსახურს, რომელიც მათ დასამტკიცებლად წარუდგენს სტუ-ს აკადემიურ საბჭოს;

2.3. სტუ სამაგისტრო საგანმანათლებლო პროგრამის განხორციელების მიზნით, განათლების ხარისხის განვითარების ეროვნული ცენტრის თანხმობით განსაზღვრავს ფაკულტეტის მიერ წარდგენილი სამაგისტრო პროგრამების ჩამონათვალის შესაბამისობას საქართველოს მთავრობის მიერ დამტკიცებულ უმაღლესი

საგანმანათლებლო დაწესებულებების მაგისტრატურის საგანმანათლებლო პროგრამულ მიმართულებებთან.

3. სამაგისტრო საგანმანათლებლო პროგრამა (კურიკულუმი)

სამაგისტრო საგანმანათლებლო პროგრამა (კურიკულუმი) შედგება შემდეგი პუნქტებისაგან:

3.1. სამაგისტრო პროგრამების უზრუნველყოფა. სამაგისტრო საგანმანათლებლო პროგრამა (შემდგომში პროგრამა) უზრუნველყოფილი უნდა იყოს:

- სასწავლო-მეთოდური და სამეცნიერო ლიტერატურით;
- სასწავლო და სამეცნიერო-კვლევითი ბაზით;
- შესაბამისი აკადემიური ხარისხის მქონე პერსონალით.

3.2. პროგრამის სახელწოდება. პროგრამის სახელწოდება უნდა ასახავდეს იმ ქვედარგს/სპეციალიზაციას, რომელშიც მაგისტრატურის კურსდამთავრებულს აკადემიური ხარისხი მიენიჭება. წარმოდგენილი უნდა იყოს პროგრამის სახელწოდების ინგლისური თარგმანი.

3.3. ფაკულტეტი. იმ ფაკულტეტის დასახელება, სადაც სრულდება სამაგისტრო პროგრამა.

3.4. სწავლების ენა. მაგისტრატურაში სწავლება უნდა მიმდინარეობდეს სამაგისტრო პროგრამის ენაზე.

3.5. პროგრამის მოცულობა კრედიტებით - 120 კრედიტი.

3.6. მისანიჭებელი კვალიფიკაცია. მითითებულ უნდა იქნეს მისანიჭებელი კვალიფიკაცია/აკადემიური ხარისხი, ქართულ და ინგლისურ ენებზე.

3.7. პროგრამის ხელმძღვანელი/ხელმძღვანელები - თანამდებობა, სახელი, გვარი.

3.8. პროგრამაზე დაშვების წინაპირობა. მსურველს უნდა ჰქონდეს ბაკალავრის ან მასთან გათანაბრებული აკადემიური ხარისხი. იგი უნდა აკმაყოფილებდეს მოცემული პროგრამისთვის წაყენებულ სხვა წინაპირობებს.

3.9. პროგრამის მიზანი. მოკლედ უნდა იყოს ჩამოყალიბებული პროგრამის მიზანი.

3.10. სწავლის შედეგები და კომპეტენციები (ზოგადი და დარგობრივი). მოკლედ უნდა იყოს ნაჩვენები პროგრამის დასრულების შემდეგ კურსდამთავრებულის დარგობრივი და ზოგადი კომპეტენციები (ცოდნა და გაცნობიერება, ცოდნის პრაქტიკაში გამოყენების უნარი, დასკვნის გაკეთების უნარი, კომუნიკაციის უნარი, სწავლის უნარი, ღირებულებები).

3.11. სწავლის შედეგების მატრიცა. სწავლის შედეგების მატრიცა აჩვენებს სასწავლო კურსების (საგნების) მიხედვით მიღწეულ სწავლის შედეგებს.

3.12. დასაქმების სფერო. აღნიშნული სამაგისტრო პროგრამის კურსდამთავრებულს სად შეეძლება მუშაობა.

3.13. **სტუდენტის სასწავლო საქმიანობა (დატვირთვა).** ლექცია, სემინარი, პრაქტიკული, ლაბორატორიული, პრაქტიკა, საკურსო სამუშაო/პროექტი, დამოუკიდებელი მუშაობა, კვლევითი კომპონენტი და სხვ.

3.14. **სტუდენტის ცოდნის შეფასება.** შეფასება ხდება 100 - ქულიანი სისტემით.

დადებით შეფასებად ჩაითვლება:

- (A) - ფრიადი - მაქსიმალური შეფასების 91% და მეტი;
- (B) - ძალიან კარგი - მაქსიმალური შეფასების 81-90%;
- (C) - კარგი - მაქსიმალური შეფასების 71-80%;
- (D) - დამაკმაყოფილებელი - მაქსიმალური შეფასების 61-70%;
- (E) - საკმარისი - მაქსიმალური შეფასების 51-60%.

უარყოფით შეფასებად ჩაითვლება:

- (FX) - ვერ ჩააბარა - მაქსიმალური შეფასების 41-50%, რაც ნიშნავს, რომ სტუდენტს ჩასაბარებლად მეტი მუშაობა სჭირდება და ეძლევა დამოუკიდებელი მუშაობით დამატებით ერთხელ გასვლის უფლება;
- (F) - ჩაიჭრა - მაქსიმალური შეფასების 40% და ნაკლები, რაც ნიშნავს, რომ სტუდენტის მიერ ჩატარებული სამუშაო არ არის საკმარისი.

3.15. **პროგრამის განხორციელებისათვის საჭირო მატერიალური რესურსი.** ჩამოთვლილი უნდა იყოს პროგრამის განხორციელებისათვის საჭირო მატერიალურ-ტექნიკური საშუალებები (ხელსაწყოები, დანადგარები, ინვენტარი, მასალები, რეაქტივები და სხვ.)

3.16. **თანდართული სილაბუსების რაოდენობა.** წარმოდგენილი უნდა იყოს პროგრამით განსაზღვრული თითოეული საგნის სილაბუსი სტუ-ში მიღებული ფორმით.

- პროგრამის საგნობრივი დატვირთვა კრედიტების მითითებით და საგნების საათობრივი განაწილება. (დანართი 1) მითითებული უნდა იყოს საგნის/მოდულის სტატუსი – ძირითადი თუ არჩევითი. ამ უკანასკნელთა მოცულობა არ უნდა აღემატებოდეს პროგრამის საერთო მოცულობის 50%-ს.
- პროგრამის საგნობრივი დატვირთვა - საგნების/მოდულების ჩამონათვალი და კრედიტების რაოდენობა სემესტრების მიხედვით.
- საგნების საათობრივი განაწილება წარმოდგენილი უნდა იყოს მეცადინეობების ფორმების მიხედვით.

3.17. **პროგრამის სტრუქტურა.**

- საგნების/მოდულების ჩამონათვალი, მათი კრედიტები და განაწილება ხდება სემესტრების მიხედვით სამაგისტრო საგანმანათლებლო პროგრამის სქემის შესაბამისად (დანართი 2). პროგრამის მთლიანი მოცულობის 120 კრედიტი ნაწილდება შემდეგნაირად: სასწავლო კომპონენტი (სასწავლო კურსები) – 75 კრედიტი, კვლევითი კომპონენტი (სამაგისტრო კვლევის პროექტი /პროსპექტუსი 5 კრედიტი, თეორიული/ექსპერიმენტული კვლევა/კოლოკვიუმი 10 კრედიტი, საკვალიფიკაციო ნაშრომის დასრულება და დაცვა 30 კრედიტი) – 45 კრედიტი; აკადემიური წლის განმავლობაში – 60 კრედიტი, სემესტრში – 30 კრედიტი.

4. მაგისტრანტის ხელმძღვანელი/ხელმძღვანელები შეიძლება იყოს სტუ-ის შესაბამისი აკადემიური დეპარტამენტის პროფესორი, ასოცირებული პროფესორი, ასისტენტ- პროფესორი, მოწვეული პროფესორი, მოწვეული ასოცირებული პროფესორი, მოწვეული ასისტენტ-პროფესორი, აგრეთვე სტუ-თან ინტეგრირებული სამეცნიერო ინსტიტუტების მთავარი ან უფროსი მეცნიერი თანამშრომელი. მაგისტრანტის ხელმძღვანელი შეიძლება იყოს სხვა (პარტნიორი) დაწესებულების დოქტორის აკადემიური ხარისხის მქონე თანამშრომელი, თუ სტუ-სა და ამ დაწესებულებას შორის არსებობს გაფორმებული ხელშეკრულება (მემორანდუმი) ურთიერთთანამშრომლობის შესახებ; მაგისტრანტის ხელმძღვანელი მაგისტრანტთან შეთანხმებით ადგენს პერსონალურ სამუშაო გეგმას (დანართი 3), სადაც უნდა იყოს მითითებული სამაგისტრო ნაშრომის დასახელება, სავალდებულო და არჩევითი საგნების/მოდულების ჩამონათვალი, კვლევითი კომპონენტით გათვალისწინებული ჩასატარებელი ღონისძიებები. იგი ხელმძღვანელობს კვლევითი კომპონენტების შესრულებას, სამაგისტრო ნაშრომის გაფორმებას და დაცვისათვის მომზადებას“. (10.11.2017, №2645)

5. ერთობლივი სამაგისტრო პროგრამების შემუშავება

5.1. სტუ-მ სამაგისტრო პროგრამები შეიძლება ერთობლივად განხორციელოს საქართველოს ერთ-ერთ უმაღლეს საგანმანათლებლო დაწესებულებასთან ან/და უცხო ქვეყნის კანონმდებლობის შესაბამისად აღიარებულ უმაღლეს საგანმანათლებლო დაწესებულებასთან. ერთობლივი პროგრამების განხორციელების წესს ადგენს სტუ კანონმდებლობის შესაბამისად. იმ პროგრამების ერთობლივად განხორციელება, რომელთათვისაც უმაღლესი განათლების შესახებ საქართველოს კანონით სავალდებულოა აკრედიტაციის გავლა, დასაშვებია მხოლოდ აკრედიტაციის გავლის შემთხვევაში.

5.2. თუ მაგისტრანტობის კანდიდატი აბარებს გამოცხადებულ ერთობლივ სამაგისტრო პროგრამაზე, იგი სამაგისტრო გამოცდებზე გადის უმაღლესი განათლების შესახებ საქართველოს კანონით დადგენილი წესის შესაბამისად.

5.3. სტუ-სა და უცხო ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების მიერ ერთობლივი სამაგისტრო პროგრამის განხორციელებისას სტუ უფლებამოსილია იმოქმედოს “უმაღლესი განათლების შესახებ” საქართველოს კანონით გათვალისწინებული ნორმების შესაბამისად.

5.4. სამაგისტრო პროგრამის განხორციელება პარტნიორი ორგანიზაციის მონაწილეობით რეგულირდება ამ ორგანიზაციასთან დადებული შეთანხმებით თანამშრომლობისა და ერთობლივი სამაგისტრო პროგრამის შესახებ.

5.5. ერთობლივი სამაგისტრო პროგრამის შემთხვევაში პროგრამას შეიძლება ჰყავდეს ორი ხელმძღვანელი. სტუ-ს ხარისხის უზრუნველყოფის სამსახურში განხილვისათვის წარსადგენი ერთობლივი სამაგისტრო პროგრამები უნდა აკმაყოფილებდეს ზემოთ მოყვანილ ყველა პირობას. ამის გარდა, აუცილებლად უნდა მიეთითოს შემდეგი ინფორმაცია:

- პარტნიორი ორგანიზაციის დასახელება;
- სამაგისტრო პროგრამის თანახელმძღვანელი პარტნიორი ორგანიზაციიდან;
- სამაგისტრო პროგრამის სწავლების ენა (უცხოელი პარტნიორების შემთხვევაში);
- სამაგისტრო პროგრამის კომპონენტები, რომლებიც განხორციელდება პარტნიორ ორგანიზაციაში (საგნები, კვლევა, პრაქტიკა, ლექტორების მოწვევა და ა.შ.);
- პარტნიორი ორგანიზაციის ფინანსური მონაწილეობა ერთობლივი სამაგისტრო პროგრამის განხორციელებისას.

ერთობლივი სამაგისტრო პროგრამის განხორციელებისათვის აუცილებელია პარტნიორ ორგანიზაციასთან გაფორმდეს შესაბამისი ხელშეკრულება (ხელშეკრულებაში უნდა აღინიშნოს ერთობლივი აკადემიური ხარისხის მინიჭების პირობები, თუ ეს იგეგმება).

6. მაგისტრატურაში ჩარიცხვა

6.1. მაგისტრატურაში სწავლის უფლება აქვს არანაკლებ ბაკალავრის ან მასთან გათანაბრებული აკადემიური ხარისხის მქონე პირს.

6.2. სტუ ვალდებულია თავის ოფიციალურ ვებგვერდზე განათავსოს და გამოცდების ეროვნულ ცენტრში საქართველოს განათლებისა და მეცნიერების მინისტრის 2009 წლის 22 აპრილის № 227 ბრძანებით განსაზღვრულ ვადაში წარადგინოს:

- ა) იმ სამაგისტრო პროგრამების ჩამონათვალი, რომელზეც შესაბამის წელს განზრახულია მაგისტრანტობის კანდიდატთა მიღება და თითოეულ მათგანზე გამოყოფილი ვაკანტური ადგილების რაოდენობა;
- ბ) ინფორმაცია თითოეული სამაგისტრო პროგრამისთვის სწავლის წლიური საფასურის შესახებ;
- გ) ინფორმაცია იმის თაობაზე, აკრედიტებულია თუ არა შესაბამისი საგანმანათლებლო პროგრამა;
- დ) ინფორმაცია სამაგისტრო პროგრამების მიხედვით სამაგისტრო გამოცდისათვის კოეფიციენტების განაწილების შესახებ;

6.3. სტუ-ში მაგისტრანტობის კანდიდატთა ჩარიცხვა ხორციელდება სამაგისტრო გამოცდის/გამოცდების შედეგების საფუძველზე.

6.4. სამაგისტრო გამოცდის/გამოცდების ჩატარების მიზანია:

ა) სტუ-ს მაგისტრატურაში მაგისტრანტობის კანდიდატთა ჩარიცხვის პროცესის ობიექტურობის და გამჭვირვალობის უზრუნველყოფა;

ბ) მაგისტრატურაში სწავლის გაგრძელების მსურველთა უნარებისა და შესაძლებლობების გამოვლენა.

6.5. სამაგისტრო გამოცდა შედგება ორი ნაწილისგან:

ა) საერთო სამაგისტრო გამოცდა;

ბ) სტუ-ს მიერ განსაზღვრული გამოცდა/გამოცდები.

6.6. საერთო სამაგისტრო გამოცდებში მონაწილეობის მიზნით, დაინტერესებული პირის რეგისტრაცია ხორციელდება გამოცდების ეროვნული ცენტრის მიერ დადგენილი პროცედურებისა და ვადების შესაბამისად.

6.7. საერთო სამაგისტრო გამოცდის შედეგად გამოვლინდება ის მაგისტრანტობის კანდიდატი, რომელიც უფლებას მოიპოვებს მონაწილეობა მიიღოს სტუ-ს მიერ განსაზღვრულ გამოცდაში/გამოცდებში (შემდგომში გამოცდა/გამოცდები).

6.8. სტუ ვალდებულია კონკრეტულ სამაგისტრო პროგრამაზე სწავლის გაგრძელების მსურველთათვის დააწესოს გამოცდა შესაბამის სპეციალობაში, ასევე უფლებამოსილია კონკრეტულ სამაგისტრო პროგრამაზე დააწესოს დამატებითი გამოცდა/გამოცდები სხვა საგანში/საგნებში.

6.9. მაგისტრანტობის კანდიდატთა ხელშეწყობისა და სტუდენტთა მობილობის მიზნით სტუ-ში სწავლა საერთო სამაგისტრო გამოცდების გავლის გარეშე, საქართველოს განათლებისა და მეცნიერების სამინისტროს მიერ დადგენილი წესით და დადგენილ ვადებში დასაშვებია:

ა) მაგისტრანტობის კანდიდატებისთვის, რომლებიც უცხო ქვეყანაში ცხოვრობდნენ ბოლო 2 ან მეტი წლის განმავლობაში და რომლებმაც უცხო ქვეყანაში მიიღეს შესაბამისი უმაღლესი განათლების აკადემიური ხარისხის დამადასტურებელი დოკუმენტი;

ბ) სწავლობენ უცხო ქვეყანაში ამ ქვეყნის კანონმდებლობის შესაბამისად აღიარებულ უმაღლეს საგანმანათლებლო დაწესებულების მაგისტრატურაში.

გ) იმ პირისათვის, რომელმაც გადალახა შესაბამისი ზღვარი საქართველოს განათლებისა და მეცნიერების სამინისტროს მიერ დამტკიცებული საერთაშორისო გამოცდების ჩამონათვალით გათვალისწინებულ გამოცდაში.

6.10. საერთო სამაგისტრო გამოცდის ჩატარების ფორმა

- საერთო სამაგისტრო გამოცდა ტარდება წერილობით, ტესტის მეშვეობით.
- საერთო სამაგისტრო გამოცდის ტესტი შედგება ოთხი ნაწილისგან:

ა) წაკითხულის გააზრება;

ბ) ანალიტიკური წერა;

გ) ლოგიკური მსჯელობა;

დ) რაოდენობრივი მსჯელობა.

6.11. მაგისტრანტობის კანდიდატი სტუ-ს მიერ განსაზღვრულ გამოცდაში/გამოცდებში მონაწილეობის უფლებას მოიპოვებს იმ შემთხვევაში, თუ ის საერთო სამაგისტრო გამოცდის ტესტის ოთხი ნაწილიდან რომელიმე სამ ნაწილში მაინც გადალახავს დადგენილი მინიმალური კომპეტენციის ზღვარს. საერთო სამაგისტრო გამოცდების შედეგების შეჯამების შემდეგ გამოცდების ეროვნული ცენტრი აქვეყნებს იმ მაგისტრანტობის კანდიდატთა პირველად შედეგებს, რომლებმაც მონაწილეობა მიიღეს საერთო სამაგისტრო გამოცდაში, ხოლო მოგვიანებით – იმ მაგისტრანტობის კანდიდატთა სიას, რომლებმაც წარმატებით ჩააბარეს აღნიშნული გამოცდები

6.12. საერთო სამაგისტრო გამოცდების წარმატებით ჩაბარების შემდეგ, მაგისტრანტობის კანდიდატი გადის სტუ-ს მიერ განსაზღვრულ გამოცდაზე/გამოცდებზე.

6.13. სტუ-ს მიერ განსაზღვრული გამოცდის/გამოცდების ჩაბარების მიზნით, მაგისტრანტობის კანდიდატთა რეგისტრაცია მიმდინარეობს სტუ-ში რექტორის ინდივიდუალური ადმინისტრაციულ-სამართლებრივი აქტით განსაზღვრული წესით და დადგენილ ვადაში. მაგისტრანტობის კანდიდატთა რეგისტრაცია უნდა დაიწყოს მაგისტრანტობის კანდიდატთა რეგისტრაციის თაობაზე რექტორის აქტის ოფიციალურ ვებგვერდზე გამოქვეყნების შემდეგ. მაგისტრანტობის კანდიდატთა რეგისტრაციის პერიოდის ხანგრძლივობა არ შეიძლება იყოს 10 კალენდარულ დღეზე ნაკლები.

6.14. მაგისტრატურაში ჩარიცხვის მსურველმა რექტორის სახელზე უნდა წარადგინოს **განცხადება** ფაკულტეტის, სამაგისტრო პროგრამის მითითებით, აგრეთვე შემდეგი საბუთები:

- პირადობის მოწმობა და მისი ასლი;
- აკადემიური უმაღლესი განათლების დამადასტურებელი დოკუმენტი – დიპლომი და მისი ასლი, ან კვალიფიკაციის დამადასტურებელი სხვა დოკუმენტი და მისი ასლი;

- ფოტოსურათი 4 ცალი ზომით 3 x4 სმ და Cd დისკი;
- მიწერის მოწმობა და მისი ასლი, ან სამხედრო ბილეთი და მისი ასლი (სამხედრო ვალდებულთათვის);
- მაგისტრანტობის კანდიდატის მიერ საერთო სამაგისტრო გამოცდებზე მიღებული შეფასებები (ამონაბეჭდი გამოცდების ეროვნული ცენტრის ვებგვერდიდან – www.naec.ge), ან ამ მუხლის მე-9 პუნქტით გათვალისწინებული დოკუმენტები;
- სტუ-ს სამაგისტრო გამოცდებში მონაწილეობისათვის დადგენილი საფასურის გადახდის ქვითარი თი-ბი-სი ბანკის რომელიმე ფილიალიდან.

მაგისტრანტობის კანდიდატი პირველადი შემოწმების მიზნით, საბუთებს წარადგენს შესაბამისი ფაკულტეტის დეკანატში; საბუთების არასრულად წარმოდგენის შემთხვევაში მისი განცხადება არ მიიღება. თუ საბუთები წესრიგშია, დედნები უბრუნდება წარმომდგენს, ხოლო ვიზირებულ განცხადებას, საბუთებთან ერთად, მაგისტრანტობის კანდიდატი აბარებს სტუ-ს კანცელარიას.

6.15. სამაგისტრო პროგრამებზე ჩარიცხვის უფლების მოსაპოვებლად მაგისტრანტობის კანდიდატმა სტუ-ს მიერ განსაზღვრულ გამოცდაში/გამოცდებში ასევე უნდა გადალახოს მინიმალური კომპეტენციის ზღვარი.

6.16. სტუ თავად ადგენს მის მიერ განსაზღვრული გამოცდის/გამოცდების შინაარს, მინიმალური კომპეტენციის ზღვარსა და გამოცდის/გამოცდების ჩატარებასთან დაკავშირებულ პროცედურულ საკითხებს. საგამოცდო ტესტების ნიმუშები განთავსდება სტუ-ს სწავლების დეპარტამენტის ვებგვერდზე გამოცდებამდე ერთი თვით ადრე.

6.17. სტუ გამოცდას/გამოცდებს ატარებს მის მიერ წინასწარ განსაზღვრულ შენობაში.

6.18. სტუ-ს მიერ განსაზღვრული გამოცდის/გამოცდების შედეგები, მიღებული მაგისტრანტობის კანდიდატის მიერ, ქვეყნდება ფაკულტეტის ოფიციალურ ვებგვერდზე.

6.19. პრეტენზიის არსებობისას მაგისტრანტობის კანდიდატი საპრეტენზიო განცხადებას წარადგენს სტუ-ს მიერ დადგენილ ვადაში. პრეტენზიების წარდგენის ვადა არ შეიძლება იყოს 3 კალენდარულ დღეზე ნაკლები სტუ-ს მიერ განსაზღვრული გამოცდის/გამოცდების შედეგების ვებგვერდზე გამოქვეყნებიდან.

6.20. მაგისტრანტობის კანდიდატის საპრეტენზიო განცხადებები განიხილება სტუ-ს მიერ შექმნილ საპრეტენზიო საბჭოზე. საპრეტენზიო საბჭო არ შეიძლება შედგებოდეს

იმ პირებისაგან, რომლებსაც მონაწილეობა აქვთ მიღებული მაგისტრანტობის კანდიდატების შეფასებაში. საბოლოო შედეგები ქვეყნდება ფაკულტეტის ვებგვერდზე.

6.21. სტუ-ს აკადემიური საბჭოს მიერ სამაგისტრო გამოცდისთვის კოეფიციენტების მინიჭების შესახებ გადაწყვეტილების მიღებისას სავალდებულოა შემდეგი მოთხოვნების დაიცვა:

ა) სამაგისტრო გამოცდების კოეფიციენტების ჯამი 100-ის ტოლია; იგი ნაწილდება საერთო სამაგისტრო გამოცდასა და სტუ-ს მიერ განსაზღვრულ გამოცდაზე/გამოცდებზე;

ბ) საერთო სამაგისტრო გამოცდისთვის მინიჭებული კოეფიციენტები უნდა გადანაწილდეს საერთო სამაგისტრო გამოცდის ტესტის თითოეულ ნაწილზე;

გ) საერთო სამაგისტრო გამოცდის ტესტის თითოეულ ნაწილს მიენიჭოს კოეფიციენტი არანაკლებ 5-სა;

დ) განისაზღვროს საერთო სამაგისტრო გამოცდის ტესტის თითოეული ნაწილისთვის მინიჭებული კოეფიციენტების საერთო ჯამი, რომელიც არანაკლებ 35-ის და არა უმეტეს 65-ის ტოლია.

6.22. სამაგისტრო გამოცდების კოეფიციენტებით რანჟირება:

ა) სტუ, მის მიერ განსაზღვრული გამოცდის/გამოცდების საბოლოო შედეგების გამოქვეყნების შემდეგ, ადგენს სამაგისტრო გამოცდების კოეფიციენტებით რანჟირების დოკუმენტს;

ბ) სამაგისტრო გამოცდების კოეფიციენტებით რანჟირების დოკუმენტში მოხვდება მხოლოდ ის მაგისტრანტობის კანდიდატი, რომელმაც საერთო სამაგისტრო გამოცდა და სტუ-ს მიერ განსაზღვრული გამოცდა/გამოცდები წარმატებით ჩააბარა;

გ) სტუ სამაგისტრო გამოცდების კოეფიციენტებით რანჟირების დოკუმენტს ქმნის შესაბამის სამაგისტრო პროგრამებზე გამოცხადებული ადგილების რაოდენობის, მაგისტრანტობის კანდიდატის მიერ მიღებული ნორმირებული ქულისა და სტუ-ს მიერ საერთო სამაგისტრო გამოცდის ტესტის ნაწილებისთვის ან/და მის მიერ განსაზღვრული გამოცდის/გამოცდებისთვის მინიჭებული კოეფიციენტის/კოეფიციენტების, ხოლო თუ კოეფიციენტები იდენტურია, ტესტის ნაწილების ან/და გამოცდის პრიორიტეტულობის გათვალისწინებით.

6.23. მაგისტრანტობის კანდიდატის საერთო სამაგისტრო გამოცდის კონკრეტული ქულა გამოითვლება შემდეგი წესით:

ა) მაგისტრანტობის კანდიდატის მიერ საერთო სამაგისტრო გამოცდის ტესტის თითოეულ ნაწილში/გამოცდაში მიღებული ქულა იყოფა ამ გამოცდის მაქსიმალურ ქულაზე და მიიღება ნორმირებული ქულა;

ბ) ნორმირებული ქულა გადამრავლდება სტუ-ს მიერ ტესტის ნაწილებისთვის წინასწარ განსაზღვრულ კოეფიციენტებზე და მიიღება საერთო სამაგისტრო გამოცდის ტესტის თითოეული ნაწილის კონკრეტული ქულა;

გ) მაგისტრანტობის კანდიდატის მიერ საერთო სამაგისტრო გამოცდებზე მიღებული კონკრეტული ქულები ჯამდება და მიიღება საერთო სამაგისტრო გამოცდის ერთიანი კონკრეტული ქულა.

6.24. მაგისტრანტობის კანდიდატის კონკრეტული ქულა სტუ-ს მიერ განსაზღვრულ გამოცდაში/გამოცდებში გამოითვლება შემდეგი წესის დაცვით:

ა) მაგისტრანტობის კანდიდატის მიერ მიღებული ქულა, სტუ-ს მიერ განსაზღვრულ გამოცდაში, იყოფა ამ გამოცდის მაქსიმალურ ქულაზე და მიიღება ნორმირებული ქულა;

ბ) ნორმირებული ქულა გადამრავლდება სტუ-ს მიერ განსაზღვრული გამოცდებისთვის წინასწარ დადგენილ კოეფიციენტზე/კოეფიციენტებზე და მიიღება სტუ-ს მიერ განსაზღვრული შესაბამისი გამოცდის/გამოცდების კონკრეტული ქულა.

6.25. მაგისტრანტობის კანდიდატთა მიერ საერთო სამაგისტრო და სტუ-ს მიერ განსაზღვრულ გამოცდებზე მიღებული კონკრეტული ქულები ჯამდება და მიიღება საკონკურსო ქულა.

6.26. საქართველოს ტექნიკურ უნივერსიტეტში ჩარიცხვა:

ა. საერთო სამაგისტრო გამოცდისა და სტუ-ს გამოცდის/გამოცდების შედეგად გამოვლინდება ის მაგისტრანტობის კანდიდატი, რომელიც უფლებას მოიპოვებს სწავლა განაგრძოს სტუ-ს მაგისტრატურაში;

ბ. საერთო სამაგისტრო გამოცდისა და სტუ-ს მიერ განსაზღვრული გამოცდის/გამოცდების წარმატებით ჩაბარების საფუძველზე მაგისტრანტობის კანდიდატი ჩაირიცხება სტუ-ს მაგისტრატურაში;

გ. სტუ-ში ჩარიცხვა ხდება სამაგისტრო გამოცდების კოეფიციენტებით რანჟირების დოკუმენტის საფუძველზე. მაგისტრანტობის კანდიდატთა სტუ-ში ჩარიცხვა შეიძლება მხოლოდ კანონმდებლობით დადგენილი წესით აღიარებული აკადემიური უმაღლესი განათლების დამადასტურებელი დოკუმენტის - დიპლომის და კანონმდებლობით დადგენილი წესით სამხედრო აღრიცხვას დაქვემდებარებული პირის მიერ სამხედრო აღრიცხვაზე ყოფნის დამადასტურებელი დოკუმენტის წარდგენის შემდეგ.

6.27. თუ სტუ-ს მაგისტრატურის სამაგისტრო პროგრამაზე მაგისტრანტობის კანდიდატთა ჩარიცხვის პროცესში აღმოჩნდება, რომ ბოლო ადგილზე რანჟირებული მაგისტრანტობის კანდიდატების ნუსხიდან, ტესტის ნაწილების/გამოცდების პრიორიტეტების გათვალისწინების შემდეგ თანაბარი ჩარიცხვის უფლება აქვს ორ ან მეტ მაგისტრანტობის კანდიდატს, სტუ იღებს გადაწყვეტილებას მისთვის გამოყოფილი მისაღებ სტუდენტთა ადგილების რაოდენობის ფარგლებში, ამ პროგრამას დაუმატოს ადგილები. იმ შემთხვევაში, თუ ჩარიცხულ სტუდენტთა რაოდენობა გადააჭარბებს სტუ-ს შესაბამისი პროგრამისთვის გამოყოფილ ადგილებზე შესაბამის წელს განსაზღვრული მისაღები სტუდენტების რაოდენობას, დამატებული სტუდენტების რაოდენობა მოაკლდება სტუ-ს სტუდენტთა მომდევნო სასწავლო წელს დადგენილ მისაღებ სტუდენტთა კონტინგენტს.

6.28. სტუ-ში მაგისტრანტობის კანდიდატთა ჩარიცხვა შეიძლება მხოლოდ კანონმდებლობით დადგენილი წესით აღიარებული აკადემიური უმაღლესი განათლების დამადასტურებელი დოკუმენტის - დიპლომის და კანონმდებლობით დადგენილი წესით სამხედრო აღრიცხვას დაქვემდებარებული პირის მიერ სამხედრო აღრიცხვაზე ყოფნის დამადასტურებელი დოკუმენტის წარდგენის შემდეგ.

6.29. სტუ-ში მაგისტრანტობის კანდიდატის ჩარიცხვა ფორმდება სტუ-სა და მაგისტრანტობის კანდიდატს შორის გაფორმებული ხელშეკრულების საფუძველზე.

6.30. იმ პირების მაგისტრატურაში ჩარიცხვის თაობაზე, რომლებთანაც გაფორმდა ხელშეკრულებები სტუ-ს მიერ, არა უგვიანეს საქართველოს განათლებისა და მეცნიერების მინისტრის 2009 წლის 22 აპრილის №227 ბრძანებით განსაზღვრული ვადისა, დგება რექტორის ერთიანი აქტი, რომელიც, ამავე ბრძანებით განსაზღვრულ ვადაში, იგზავნება გამოცდების ეროვნულ ცენტრსა და განათლების ხარისხის განვითარების ეროვნულ ცენტრში;

6.31. ერთიანი აქტის გამოცემის შემდეგ პირი ხდება სტუ-ს სტუდენტი მაგისტრანტი.

7. სასწავლო პროცესი

7.1. სასწავლო პროცესი მიმდინარეობს სამაგისტრო პროგრამის სასწავლო გეგმის (კურიკულუმის) საფუძველზე. სამაგისტრო საგანმანათლებლო პროგრამის სქემა მოცემულია დანართი 1-ში, საგნობრივი დატვირთვისა და საგნობრივი განაწილების ცხრილი მოცემულია დანართ 2-ში.

7.2. საგანმანათლებლო პროგრამით გათვალისწინებული საგნების ცოდნის შეფასების ფორმების შესაბამისი მეთოდების, კრიტერიუმებისა და სკალების აღწერა მოცემულია სილაბუსებში, თან ერთვის საგანმანათლებლო პროგრამას, აგრეთვე განთავსებულია უნივერსიტეტის ვებ-გვერდზე <http://www.gtu.ge/quality/axali/shefasebisforma.pdf>.

კვლევითი კომპონენტის შეფასების კრიტერიუმები მოცემულია სამაგისტრო საგანმანათლებლო პროგრამის კვლევითი კომპონენტების შეფასების წესიში (დანართი 4)

7.3. ბრძანებას მაგისტრანტის ხელმძღვანელისა და სამაგისტრო ნაშრომის დასახელების შესახებ ადგენს დეკანატი და ამტკიცებს ფაკულტეტის საბჭო. მაგისტრანტის პერსონალური სამუშაო გეგმის შესაბამისად .

7.4. ხელმძღვანელისა და სამაგისტრო ნაშრომის დასახელების ცვლილება შეიძლება მოხდეს სემესტრის დასაწყისში. დეკანის მიერ შედგენილ შესაბამისი ბრძანების პროექტს ამტკიცებს ფაკულტეტის საბჭო.

7.5. მაგისტრანტის მიერ მიღებული კვლევის შედეგები აისახება საკვალიფიკაციო ნაშრომში, რომელიც უნდა შესრულდეს სწავლების ენაზე დადგენილი ფორმისა და წესის მიხედვით. (დანართი 5)

7.6. მაგისტრანტის საკვალიფიკაციო ნაშრომი წარმოადგენს დასრულებულ სამუშაოს, რომელშიც აისახება კურსდამთავრებულის მიერ ისეთი სამუშაოების ჩატარების უნარი, როგორცაა სამეცნიერო-კვლევითი, საპროექტო და ა.შ. საკვალიფიკაციო ნაშრომის დაცვისას მაგისტრანტმა უნდა წარმოადგინოს მის მიერ შესრულებული სამუშაო და წარმოაჩინოს დისკუსიაში მონაწილეობის უნარი.

7.7. მაგისტრანტმა, საკვალიფიკაციო ნაშრომთან ერთად, უნდა წარმოადგინოს ხელმძღვანელისა და რეცენზენტის წერილობითი დასკვნები.

7.8. დეკანის ბრძანებით რეცენზენტად მტკიცდება პირი, რომელსაც საკვალიფიკაციო ნაშრომის შესაბამის/მონათესავე სპეციალობაში გამოქვეყნებული აქვს სულ ცოტა

სამი ნაშრომი. რეცენზენტი არ შეიძლება იყოს მაგისტრანტის მიერ შესრულებული რომელიმე სამუშაოს თანაავტორი;

7.9. რეცენზენტის დასკვნაში დასაბუთებული უნდა იყოს წინადადება მაგისტრანტის საკვალიფიკაციო ნაშრომის დაცვაზე დაშვების ან უარის შესახებ.

7.10. მაგისტრანტს აქვს დაცვაზე გასვლის უფლება რეცენზენტის უარყოფითი შეფასების შემთხვევაშიც.

7.11. მაგისტრანტს, რომელმაც გეგმურ ვადაში ვერ დაასრულა საგანმანათლებლო პროგრამა, უფლება აქვს არა უმეტეს 2 დამატებითი სემესტრით გაიგრძელოს სტუდენტის სტატუსი. ამისათვის მან მომდევნო სემესტრის დაწყებამდე არანაკლებ ორი კვირით ადრე განცხადებით უნდა მიმართოს რექტორს და დადებითი გადაწყვეტილების გამოტანისა და შესაბამისი ბრძანების გამოცემის შემთხვევაში, გააფორმოს სასწავლო და საფინანსო ხელშეკრულება არსებული წესის თანახმად;

7.12. მაგისტრანტს, რომელმაც გეგმურ ვადაში ვერ დაასრულა საგანმანათლებლო პროგრამა და მის დასასრულებლად განცხადებით არ მიმართა რექტორს დამატებითი სემესტრის აღების შესახებ, დეკანის წარდგინებით უჩერდება სტუდენტის სტატუსი.

7.13. მაგისტრანტმა საქართველოში არ ყოფნის დამადასტურებელი დოკუმენტის წარმოდგენის შემთხვევაში, რექტორის ნებართვით, შეიძლება კოლოკვიუმი ჩაატაროს დისტანციურად ონლაინ რეჟიმში (სკაიპით) კომისიური წესით. (25.07.2018, №01-05-04/191).

8¹. სწავლება-სწავლის არასრული დატვირთვის რეჟიმი

8¹.1. სტუ უფლებამოსილია, საგანმანათლებლო მიზნებიდან გამომდინარე, განახორციელოს სწავლება-სწავლის პროცესი არასრული დატვირთვით მაგისტრატურის საგანმანათლებლო პროგრამების ფარგლებში;

8¹.2. სწავლება-სწავლის არასრული დატვირთვის რეჟიმი ნიშნავს სტუდენტის სასწავლო დატვირთვას კვირაში დამოუკიდებელი და საკონტაქტო საათების ჯამური მოცულობით არაუმეტეს 25 ასტრონომიული საათისა;

8¹.3. სწავლება-სწავლის არასრული დატვირთვის განსაზღვრისას ერთი აკადემიური წელი მოიცავს საშუალოდ 30 (ECTS) კრედიტს. (25.07.2018, №01-05-04/191)

8. საგამოცდო კომისია. დაცვა

8.1. სამაგისტრო ნაშრომის დაცვაზე დაიშვება პირი, რომელმაც შეასრულა საგანმანათლებლო პროგრამით გათვალისწინებული ყველა კომპონენტი, გარდა კომპონენტისა “საკვალიფიკაციო ნაშრომის დასრულება და დაცვა”, დააგროვა 90 (ოთხმოცდაათი) კრედიტი. საკვალიფიკაციო ნაშრომების დაცვის ჩატარებისა და კვალიფიკაციის მინიჭების მიზნით დეკანი ფაკულტეტის ხარისხის უზრუნველყოფის სამსახურის უფროსთან შეთანხმებით სწავლების დეპარტამენტში წარადგენს საგამოცდო კომისიის/კომისიების შემადგენლობას; სწავლების დეპარტამენტი ამზადებს შესაბამისი ერთიანი ბრძანების პროექტს.

8.2. საგამოცდო კომისია უნდა შედგებოდეს სამაგისტრო პროგრამის შესაბამისი/მონათესავე დარგის სტუ-ს სრული/ასოცირებული და მოწვეული პროფესორებისაგან; ასევე შეიძლება სხვა დაწესებულების დოქტორის აკადემიური ხარისხის მქონე სპეციალისტების ჩართვა.

8.3. საგამოცდო კომისია უნდა შედგებოდეს 5-7 წევრისაგან. მას ხელმძღვანელობს კომისიის თავმჯდომარე, რომელიც უნდა იყოს სტუ-ს აკადემიური პერსონალი. დაცვას უნდა ესწრებოდეს კომისიის 2/3-ზე მეტი.

8.4. დაცვას, როგორც წესი, უნდა ესწრებოდეს მაგისტრანტის ხელმძღვანელი.

8.5. მაგისტრანტი კომისიას მოახსენებს საკვალიფიკაციო ნაშრომის ძირითად დებულებებს და მიღებულ შედეგებს, საკვალიფიკაციო ნაშრომის დაცვის დროს მაგისტრანტმა შეიძლება გამოიყენოს თვალსაჩინო მასალა: პლაკატები, ვიდეო-კინო გასაშვები ტექნიკა და ა.შ.

8.6. მაგისტრანტი პასუხობს კომისიის წევრთა მიერ დასმულ შეკითხვებზე, კომისიის თავმჯდომარე ან კომისიის რომელიმე წევრი კითხულობს რეცენზიას. მაგისტრანტი კომენტარს აკეთებს რეცენზენტის შენიშვნებზე.

8.7. საგამოცდო კომისია, დახურულ სხდომაზე, დაცვის დამთავრებისთანავე 3.14

პუნქტში მითითებული 100-ქულიანი სისტემით აფასებს მაგისტრანტის ნაშრომს.

სამაგისტრო საგანმანათლებლო პროგრამის კვლევითი კომპონენტების შეფასების წესის შესაბამისად. 3.14. პუნქტის "A"-“E” ქვეპუნქტებით გათვალისწინებული შეფასების მიღებისას, კურსდამთავრებულს ენიჭება მაგისტრის აკადემიური ხარისხი; ხოლო “FX”-“F” ქულით შეფასებისას საკვალიფიკაციო ნაშრომი არ ითვლება დაცულად, მაგისტრანტს ეძლევა უფლება საკვალიფიკაციო ნაშრომის

გადამუშავები–სათვის გაიგრძელოს სტუდენტის სტატუსი ერთი სემესტრით თუ არ უსარგებლია 7.11 პუნქტში მითითებული პირობით .

8.8. დაცვა არის საჯარო, მის მსვლელობასა და შედეგზე უნდა შედგეს ოქმი, რომელშიც აისახება კომისიის გადაწყვეტილება კვალიფიკაციის მინიჭების შესახებ.

8.9. საგამოცდო კომისიის ერთ სხდომაზე შეიძლება ჩატარდეს რამდენიმე სამაგისტრო ნაშრომის დაცვა.

8.10. მაგისტრანტმა საქართველოში არ ყოფნის დამადასტურებელი დოკუმენტის წარმოდგენის შემთხვევაში, რექტორის ნებართვით და აკადემიური საბჭოს გადაწყვეტილებით, შეიძლება დაიცვას სამაგისტრო ნაშრომი დისტანციურად, ონლაინ რეჟიმში (სკაიპით).*(25.11.2018, №01-05-04/191)*

9. მაგისტრის აკადემიური ხარისხის დამადასტურებელი დიპლომი

9.1. საგამოცდო კომისიის ოქმის საფუძველზე დეკანატი ამზადებს ბრძანების პროექტს და გადასცემს სწავლების დეპარტამენტს, მაგისტრის ან მაგისტრის წარჩინების დიპლომის გაცემის შესახებ.

9.2. მაგისტრის აკადემიური ხარისხის მინიჭების დამადასტურებელ მაგისტრის დიპლომს, მაგისტრის წარჩინების დიპლომს, დანართთან ერთად, გასცემს სტუ-ს შესაბამისი სამსახური.

9.3. მაგისტრის წარჩინების დიპლომის მისაღებად ყველა საგანში მიღებული შეფასების საშუალო შეწონილი სიდიდე, აგრეთვე საკვალიფიკაციო ნაშრომის დაცვის შეფასება უნდა იყოს 91 და მეტი ქულა.

10. ბათილობა

მაგისტრანტის საქმის წარმოებისას არასწორი მონაცემების წარდგენა, ან პლაგიატი არის მაგისტრის აკადემიური ხარისხის დამადასტურებელი დიპლომის არგაცემის ან ჩამორთმევის საფუძველი. შესაბამის გადაწყვეტილებას იღებს ფაკულტეტის საბჭო.

11. შენახვა

11.1. დაცული საკვალიფიკაციო ნაშრომები, დაცვის შემდეგ არა უგვიანეს ერთი თვისა, უნდა ჩაბარდეს სტუ-ს არქივს.

11.2. საკვალიფიკაციო ნაშრომის ჩაბარებისას ფორმდება მიღება-ჩაბარების აქტი 2 ეგზემპლარად, რომელთაგან ერთი ეგზემპლარი ინახება ჩამბარებელთან, მეორე – მიმღებთან.